

Na osnovu člana 21. stav (2) tačka e) Zakona o unutrašnjim poslovima Kantona Sarajevo ("Službene novine Kantona Sarajevo", broj 1/16) i člana 80. stav (1) tačka f), a u vezi s članom 63. stav (3) Zakona o nabavljanju, držanju i nošenju oružja i municije ("Službene novine Kantona Sarajevo", broj 1/18), na prijedlog policijskog komesara, ministar unutrašnjih poslova Kantona Sarajevo donosi

PRAVILNIK

O UVJETIMA POTREBNIM ZA IZDAVANJE ODOBRENJA ZA OBAVLJANJE DJELATNOSTI PROMETA ORUŽJA, BITNIH DIJELOVA ORUŽJA I MUNICIJE, POSREDOVANJA U PROMETU ORUŽJA, BITNIH DIJELOVA ORUŽJA I MUNICIJE, OSNIVANJA CIVILNIH STRELIŠTA, NAČINU ČUVANJA I DRŽANJA ORUŽJA, BITNIH DIJELOVA ORUŽJA I MUNICIJE, NAČINU UTVRĐIVANJA UVJETA, SASTAVU, PRAVU NA NAKNADU I VISINI NAKNADE KOMISIJE NADLEŽNE POLICIJSKE UPRAVE U UPRAVI POLICIJE MINISTARSTVA UNUTRAŠNJIH POSLOVA KANTONA SARAJEVO

DIO PRVI - OPĆE ODREDBE

Član 1. (Predmet)

Ovim pravilnikom se, u skladu s odredbama Zakona o nabavljanju, držanju i nošenju oružja i municije ("Službene novine Kantona Sarajevo", broj 1/18, u daljnjem tekstu: Zakon), uređuju uvjeti potrebni za izdavanje odobrenja za obavljanje djelatnosti prometa oružja, bitnih dijelova oružja i municije, posredovanja u prometu oružja, bitnih dijelova oružja i municije (brokering), osnivanja civilnih strelišta, vršenje nadzora u skladu s odredbama člana 72. Zakona, načinu čuvanja i držanja oružja, bitnih dijelova oružja i municije, načinu utvrđivanja uvjeta, sastavu, pravu na naknadu i visini naknade komisija nadležnih policijskih uprava u Upravi policije Ministarstva unutrašnjih poslova Kantona Sarajevo (u daljnjem tekstu: Komisija).

Član 2. (Komisija)

- (1) Načelnik nadležne policijske uprave rješenjem formira Komisiju od tri člana koja će preduzimati poslove i zadatke iz člana 3. ovog pravilnika, kao i iz provedbenog propisa iz člana 80. stav (1) tačka b) Zakona (ista Komisija).
- (2) Komisiju iz stava (1) ovog člana sačinjavaju predsjednik i dva člana.
- (3) Predsjednik i prvi član Komisije su policijski službenici dok je drugi član Komisije viši samostalni referent za oružje kao stručni član Komisije.
- (4) Predsjednik i članovi Komisije su zaposlenici visokih moralnih, profesionalnih i stručnih kvaliteta koji raspolažu potrebnim sposobnostima i znanjem za kvalitetno, efikasno i zakonito obavljanje predmeta rada.
- (5) Komisija podnosi Izvještaj o radu za protekli mjesec.
- (6) Predsjedniku i članovima Komisije za obavljanje poslova propisanih ovim pravilnikom pripada naknada koju rješenjem određuje policijski komesar.
- (7) Komisija radi u punom sastavu i odluke donosi većinom glasova.
- (8) Kada se radi o potrebi hitnog odlučivanja, u slučaju opravdanog, dužeg odsustva jednog od članova Komisije (npr. bolest, viša sila i dr.), načelnik nadležne policijske uprave rješenjem postavlja drugog člana Komisije, a istim rješenjem razrješava odsutnog člana.

Član 3. (Poslovi i zadaci Komisije)

Komisija je, u skladu s odredbama Zakona i ovog pravilnika, nadležna vršiti sljedeće poslove i zadatke:

- a) cijeniti ispunjavanje uvjeta potrebnih za izdavanje odobrenja za obavljanje djelatnosti prometa oružjem, bitnim dijelovima oružja i municijom na malo pravnih lica i poduzetnika,
- b) cijeniti ispunjavanje uvjeta potrebnih za izdavanje odobrenja za obavljanje djelatnosti posredovanja (brokering) u prometu oružja, bitnih dijelova oružja i municije pravnih lica i poduzetnika,
- c) cijeniti ispunjavanje uvjeta potrebnih za izdavanje odobrenja za osnivanje civilnog strelišta pravnih lica i poduzetnika,
- d) vršiti nadzor u skladu s odredbama člana 72. Zakona i
- e) cijeniti ispunjenost uvjeta koji se odnose na način čuvanja i držanja oružja, bitnih dijelova oružja i municije.

Član 4. (Zapisnik)

Nakon preduzimanja poslova i zadataka iz člana 3. ovog pravilnika, Komisija će u tri primjerka sačiniti zapisnik koji sadrži:

- a) imena i prezimena članova Komisije,
- b) ime i prezime i adresa fizičkog lica, odnosno naziv i sjedište pravnog lica i poduzetnika,
- c) predmet rada (jedan od osnova iz člana 3. ovog pravilnika),
- d) sve objektivno utvrđene činjenice, bitne za rješavanje predmeta,
- e) dokazna sredstva (određena dokumentacija, izvještaji, zapisnici, fotodokumentacija i sl.) uz naznaku na koji su način pribavljena,
- f) konstatovane nepravilnosti i nezakonitosti u radu i označenje lica koji su za njih odgovorni (član 3. tačka d) pravilnika),
- g) mjere i radnje za otklanjanje uočenih i konstatovanih nepravilnosti, rokove i nosioce aktivnosti za njihovo izvršenje,
- h) ocjena općeg stanja i zaključak o predmetu i
- i) druge podatke od značaja za postupak.

DIO DRUGI - NAČIN VRŠENJA POSLOVA I ZADATAKA KOMISIJE I DRUGIH

Član 5.

(Rad Komisije i drugih po zahtjevu za izdavanje odobrenja za obavljanje djelatnosti prometa oružja, bitnih dijelova oružja i municije na malo)

- (1) Komisija u postupku ocjene ispunjavanja uvjeta potrebnih za izdavanje odobrenja za obavljanje djelatnosti prometa oružja, bitnih dijelova oružja i municije na malo pravnih lica i poduzetnika utvrđuje ispunjavanje sljedećih uvjeta:
 - a) da su ispunjeni prostorni i tehnički uvjeti za smještaj i čuvanje, kojima se obezbjeđuje da oružje, bitni dijelovi oružja i municija ne dođu u posjed neovlaštenih lica i ne ugroze bezbjednost ljudi i objekata,
 - b) da odgovorno lice u pravnom licu, odnosno poduzetnik ispunjava uvjete iz člana 10. stav (4) Zakona, a lice koje neposredno rukuje oružjem ispunjava uvjete iz člana 10. st. (4) i (5) Zakona i
 - c) da pravno lice i poduzetnik ima pravo vlasništva ili pravo korištenja poslovnog prostora u kojem će se obavljati promet oružja, bitnih dijelova oružja i municije.
- (2) Komisija će izvještaj o utvrđenom stanju, putem nadležne policijske uprave, dostaviti policijskom komesaru.

Član 6.

(Rad Komisije i drugih po zahtjevu za izdavanje odobrenja za obavljanje djelatnosti posredovanja - brokeringa u prometu oružja, bitnih dijelova oružja i municije pravnih lica i poduzetnika)

- (1) Komisija u postupku ocjene ispunjavanja uvjeta za izdavanje odobrenja za obavljanje djelatnosti posredovanja (brokering) u prometu oružja, bitnih dijelova oružja i municije pravnih lica i poduzetnika utvrđuje ispunjavanje sljedećih uvjeta:

- a) da pravno lice i poduzetnik ima dokaz o pravu vlasništva ili pravu korištenja poslovnog prostora (npr. ugovor o zakupu) u kojem će se obavljati posredovanje (brokering) u prometu oružja, bitnih dijelova oružja i municije i
 - b) da odgovorna lica, kao i lica zaposlena u pravnom licu ili kod poduzetnika, podnosioca zahtjeva za izdavanje odobrenja za obavljanje djelatnosti posredovanja (brokering) u prometu oružja, bitnih dijelova oružja i municije, ispunjavaju uvjete iz člana 10. stav (4) tač. c), d), e), f) i g) Zakona.
- (2) Pored uvjeta iz stava (1) ovog člana, posredovanjem u prometu oružja može se baviti pravno lice i poduzetnik koji ispunjava uvjete iz propisa o prevozu, prometu, kontroli i kretanju oružja i municije.

Član 7.

(Rad Komisije i drugih po zahtjevu za izdavanje odobrenja za osnivanje civilnih strelišta)

- (1) Komisija u postupku ocjene ispunjavanja uvjeta za izdavanje odobrenja za osnivanje civilnih strelišta pravnih lica i poduzetnika utvrđuje ispunjavanje sljedećih uvjeta:
 - a) da su ispunjeni prostorni i tehnički uvjeti za smještaj i čuvanje, kojima se obezbjeđuje da oružje i municija ne dođu u posjed neovlaštenih lica i ne ugroze bezbjednost ljudi i objekata,
 - b) da odgovorno lice u pravnom licu, odnosno poduzetnik ispunjava uvjete iz člana 10. stav (4) Zakona, a lice koje neposredno rukuje oružjem ispunjava uvjete iz člana 10. st. (4) i (5) Zakona i
 - c) da pravno lice i poduzetnik ima pravo vlasništva ili pravo korištenja objekta (otvorenog i/ili zatvorenog) i poslovnog prostora koji će biti u funkciji civilnog strelišta.
- (2) Komisija će izvještaj o utvrđenom stanju, putem nadležne policijske uprave, dostaviti policijskom komesaru.

Član 8.

(Rad Komisije i drugih u vršenju nadzora u skladu s odredbama člana 72. Zakona)

- (1) Nadležne policijske uprave, ako Zakonom nije drugačije propisano, putem Komisije, vrše neposredni nadzor nad:
 - a) prodajom, držanjem i nošenjem oružja i municije,
 - b) čuvanjem i smještajem oružja i municije od strane pravnih lica i poduzetnika koji se bave prometom oružja i municije, sportskih streljačkih organizacija, organizacija koje gazduju lovištem, pravnih lica i poduzetnika koji se bave popravljanjem i prepravljanjem oružja i trajnim onesposobljavanjem oružja, posrednika u prometu oružja, bitnih dijelova oružja i municije, pravnih lica i poduzetnika, osnivača civilnih strelišta,
 - c) vođenjem evidencija iz člana 70. Zakona i
 - d) sportskim streljačkim, odnosno drugim organizacijama ili ustanovama koje obavljaju obuku za tehnička znanja za pravilno rukovanje oružjem.
- (2) U obavljanju nadzora iz stava (1) ovog člana ovlaštena lica Komisije ovlaštena su:
 - a) skladišta oružja i municije, civilna strelišta i druge prostorije gdje se obavlja promet, posredovanje, popravljnje, prepravljnje i čuvanje oružja i municije te obavljanje obuke iz člana 16. stav (1) tačka b) Zakona,
 - b) izvršiti pregled propisanih evidencija i ostale dokumentacije u vezi s prometom, posredovanjem, popravljnjem, prepravljnjem, čuvanjem oružja i municije, vođenjem civilnih strelišta i obavljanjem obuke iz člana 16. stav (1) tačka b) Zakona,
 - c) privremeno zabraniti obavljanje djelatnosti prometa, posredovanja, popravljnja i prepravljnja oružja i municije,
 - d) privremeno zabraniti upotrebu civilnih strelišta i obavljanje obuke iz člana 16. stav (1) tačka b) Zakona,

- e) narediti da se utvrđene nepravilnosti otklone u određenom roku i
 - f) zabraniti daljnje bavljenje prometom, posredovanjem, popravljnjem i prepravljnjem oružja i municije, odnosno upotrebu civilnih strelišta, obavljanje obuke, ako utvrdi da su u obavljanju tih djelatnosti učinjeni teži propusti u preduzimanju zaštitnih ili drugih sigurnosnih mjera ili druge teže kažnjive radnje, ukoliko je prestao postojati neki od uslova pod kojima je odobrenje izdato ili ako se ne postupi po nalogu nadležne policijske uprave i narediti preduzimanje i drugih propisanih mjera.
- (3) Lica iz člana 72. stav (1) Zakona dužna su omogućiti obavljanje nadzora i dati na uvid traženu dokumentaciju, kao i pružiti potrebne podatke i obavijesti.
- (4) Mjere iz stava (2) ovog člana naređuju se rješenjem.
- (5) Žalba na rješenje iz stava (4) ovog pravilnika ne odlaže izvršenje rješenja.
- (6) Na postupak vršenja nadzora iz ovog člana odgovarajuće se primjenjuju odredbe:

- a) Pravilnika o načinu rada komisija nadležnih policijskih uprava u Upravi policije Ministarstva unutrašnjih poslova Kantona Sarajevo i drugih u postupku ocjene ispunjavanja uvjeta i opravdanosti zahtjeva za dobijanje odobrenja za nabavljanje oružja i pravu na naknadu i
- b) Pravilnika o načinu rada Komisije za nadzor nad provođenjem i primjenom Zakona o nabavljanju, držanju i nošenju oružja i municije u Upravi policije Ministarstva unutrašnjih poslova Kantona Sarajevo.

Član 9.

(Evidencija nadzora)

- (1) Komisija će voditi Evidenciju nadzora.
- (2) Evidencija nadzora vodi se u formatu A4, uspravno, jednostranično na obrascu broj 1. koji je sastavni dio ovog pravilnika i sadrži sljedeće rubrike:
 - a) redni broj,
 - b) ime i prezime fizičkog lica ili naziv pravnog lica ili poduzetnika kod kojeg se vrši nadzor,
 - c) oblik nadzora,
 - d) vrijeme i mjesto vršenja nadzora,
 - e) sadržaj nadzora,
 - f) ime i prezime članova Komisije i
 - g) primjedba.

Član 10.

(Način utvrđivanja uvjeta u postupku rješavanja po zahtjevima)

- (1) Komisija u postupku rješavanja po zahtjevima iz ovog pravilnika ispunjenost uvjeta utvrđuje na sljedeće načine:
 - a) vrši pregled zahtjeva i dostavljene dokumentacije uz isti i po potrebi upućuje podnosioca na dopunu zahtjeva,
 - b) vrši uvid u potrebne evidencije i drugu raspoloživu dokumentaciju sa kojom raspolaže nadležna policijska uprava, kao i podnosilac zahtjeva,
 - c) obavlja neophodnu usmenu (građani i službena lica) i pismenu korespondenciju sa nadležnim institucijama (druge policijske agencije, sud, tužilaštvo, ministarstva, općinski organi, inspekcije i dr.),
 - d) vrši neposredan pregled skladišta oružja i municije, civilnih strelišta i drugih prostorija gdje će se obavljati promet, posredovanje, popravljnje, prepravljnje i čuvanje oružja i municije te obavlja obuka iz člana 16. stav (1) tačka b) Zakona i
 - e) obavlja druge službene radnje.
- (2) Prilikom utvrđivanja ispunjenosti uvjeta koji se odnose na siguran smještaj i čuvanje oružja, bitnih dijelova oružja i municije odgovarajuće se primjenjuju odredbe Pravilnika o smještanju i čuvanju oružja i municije.

DIO TREĆI - PRELAZNE I ZAVRŠNE ODREDBE

Član 11.
(Ravnopravnost spolova)

Gramatička terminologija korištenja muškog ili ženskog roda u ovom pravilniku podrazumijeva uključivanje oba roda.

Član 12.
(Stupanje na snagu)

Ovaj pravilnik stupa na snagu narednog dana od dana objavljivanja u "Službenim novinama Kantona Sarajevo".

Broj 01/2-05-4035/18
06. jula 2018. godine
Sarajevo

Ministar
Vedran Mulabdić, s. r.

Obrazac broj 1

EVIDENCIJA NADZORA

Redni broj	Ime i prezime fizičkog lica ili naziv pravnog lica ili poduzetnika	Oblik nadzora	Vrijeme i mjesto vršenja nadzora	Sadržaj nadzora	Ime i prezime članova Komisije	Primjedba
